



Izvještaj ESI-ja o kršenju prava decertificiranih policajaca Međunarodni dužnosnici bili svjesni grešaka

Dnevni Avaz
February 10, 2007

Jedina aktivnost u kojoj su se OHR i UN složili je da natjeraju bh. sudove i upravu da ne urade ništa *
Podržavaju odluku da se osnuje komisija za reviziju.

Evropska inicijativa za stabilnost (ESI), u najnovijem izvještaju pod naslovom "Na planini Olimp. Kako su Ujedinjeni narodi kršili ljudska prava u BiH, i zašto ništa nije napravljeno da se to ispravi", istražuje povredu ljudskih prava decertificiranih policajaca u BiH od strane Misije UN, kao i pokušaje Odjela za mirovne operacije UN da izbjegniju odgovornost zbog posljedica.

Očite greške

U izvještaju, do kojeg je došao "Dnevni avaz", podsjeća se da je IPTF od 1999. do 2002. izvršio provjeru bh. policajaca i proglasio skoro 800 nepodobnim za obavljanje policijskih dužnosti, ali da su u toku tog procesa napravljene brojne greške, koje je i Venecijanska komisija okarakterizirala kao kršenje ljudskih prava.

Alarmantno je to da i nakon što su greške postale očite, UN, OHR i druge međunarodne organizacije u BiH i dalje odbijaju da ih poprave ili dozvole bh. institucijama da to same urade. Umjesto toga, međunarodna misija staje u svoju odbranu, optužujući bh. vlasti da pokušavaju umanjiti vladavinu zakona - smatraju u ESI-ju.

U središtu ovog izvještaja je pismena prepiska između visokog predstavnika u BiH Pedija Ešdauna (Paddy Ashdown) i generalnog podsekretara UN-a za mirovne operacije u Njujorku Žan-Mari Guenena (Jean-Marie Guehen).

Prepiska pokazuje da su međunarodni dužnosnici godinama bili svjesni da su napravljene greške. Ali nije

poduzeto ništa da se problemi riješe. Jedina aktivnost u kojoj su se dvije organizacije mogle složiti bila je da natjeraju bh. sudove i upravu da ne urade ništa - navodi se u izvještaju.

Preispitivanje slučajeva

ESI podržava odluku bh. vlade iz decembra 2006. da se osnuje komisija koja će preispitati slučajeve 265 decertificiranih policajaca koji su pokrenuli tužbe na sudovima.

Uprkos optužbama od strane međunarodne zajednice da to predstavlja kršenje međunarodnog zakona, bh. vlada je odlučila da je njena prva obaveza zaštita ustavnih prava njenih građana. Ovo je potpuno ispravan tok aktivnosti u suverenoj državi i nadamo se da će nova vlada BiH nastaviti tim pravcem - stav je ESI-ja.

Lekcija i za nove misije

Lekcije iz ove priče su direktno primjenjive na bilo koju postkonfliktnu misiju koju bi UN ili EU mogle obavljati u budućnosti, smatraju u ESI-ju.

Tamo gdje se javni djelatnici provjeravaju, moraju biti u mogućnosti podnijeti žalbu na bilo koju odluku sudu ili nezavisnom tijelu. Ako se zanemare ovakvi osnovni principi, umanjuju se i legitimnost i krajnji ciljevi misije - zaključuje se u izvještaju.